


FASNACHTSGESELLSCHAFT



BASEL ALTI GARDE GEGR. 1995

Fasnacht 2015

Groosmacht Schwyz

Friener hän sich amme d Aidgenosse
D Kepf ygschlaage und hän das gnosse
Als Landsgnächt sin si sich fir fremdi Heere
Und fir e bitzeli Sold in d Schlacht go weere
Und hän sich als Zytverdriib und mit Verdraue
Geegesytig umbrocht oder bluetig ghaue
Als Ryslaifer hän si sich verdunge
Und in vyylne Grieg als Söldner grunge
Fir e Handgäld hän si sich verkauft
Und in männgem fremde Händel grauft
Das isch so bis fuffzäähundertffufzää gange
Denn het z Marignano unde d Vernumft aagfange
Nodäm me sich geegesytig abgmurggst het
Und s fir die maischte worden isch iir Stärbebett
Sin die wo iiberläbt hän zrugg in d Heimet ghungge
Und dr Sänsemaa het hönisch gwungge
Vo dert aa sin d Schwyzer brav dehaime bliibe
Und s het si nytme in fremdi Griegsdienst driibe
So het also dert bi Mailand unde
D Groosmacht Schwyz iir Ändi gfunde
Denn dr Brueder Klaus het scho de Schwyzer gsait
Steckt eure Zäune nicht zu weit
Und mischet Eych nid in fremdi Händel y
Denn d Groosmacht-Glischt die sin verby
Fimfhundert Joor sin siiderhäär duur s Land
Und die glai Schwyz – s isch allerhand
Het als Glaistaat e guets Blätzli gfunde
Und s Groosmacht-Dängge iiberwunde
Doch uffsmool ändere sich d Zyte
Und es kemme d EU-Noochber z schrytte
Es frooge sich d Noochberregioone
Ob en Aaschluss an d Schwyz wurdi loone
So maine zem Byspiil d Südtiroler
Bi eich Schwyzer wär s uns wooler
Mir wänn nimme zue Italie gheere
Die Mafiosi dien uns z lang scho steere
Als Kanton Südtirol wänn mir zur Schwyz
Mir maine s ärscht, das isch kai Witz
Als näggschti mälde sich d Lombarde
Denn au die kenne s kuum erwarte
As si als Kanton Lombardei
Bald Schwyzer wärde und EU-frei
In Franggrych blange die vo Savoye
Bis si as Schwyzer-Buure derfe heue
So wird dr Gämfersee juhee
Zum greeschte Schwyzer Binnese

Au d Noochbere vom Elsass ääne
Bringt d EU-Mitgliidschaft zem Gääne
Si fyyle sich z Franggryych lengscht als Gloon
Wänn drum zur Schwyz als nei Kanton
So goot vo Blotze bis Millhuuse
D Schwyz scho bald wyt ins Elsass uuse
Au d Bayre saage scho: O mai
Miar san in Dytschland nimm dehai
Und mechten is gärn dr Schwyz aaschliesse
Und als Kanton Bayern wyter spriesse
So wurdi BMW und Audi
Ze Schwyzer Auti, dasch e Gaudi
Und au s Oktoberfescht - dasch s Bescht
Wurd glatt zum greeschte Schwyzer Fescht
Und dangg em Münchner FCB
Waggst s Schwyzer Fuessball Renomee
Denn wäre doo au no d Sarde
Die kenne s nämmlig kuum erwarte
Bis as Sardinie au zer Schwyz wurd gheere
Denn d Italiäner wurdi das kuum steere
Nadyrlig wär das ganz famoos
Denn hät d Schwyz ändlig au e Meer-Aastoss
Und dr Ueli Muurer wurd - s isch genial
Beförderet zum Admiral
Au die vom Ländle Vorarlbürg
Fyyle sich in Österreich als Gartezwürg
Und z wyt ewägg vom Puls vo Wien
Drum si sich als Neikanton bewärbe dien
Zwoor het das dr Vorarlbürg schon emool brobiert
Und d Schwyzer hän si doozmool abserviert
Doch hitte herrsche anderi Zyte
Und d Schwyz losst sich nid e zwait Mool bitte
Gnau so mit Württebürg und Baade
Die zwai Kanteen wurde au nid schaade
So kunnt denn d Schwyz s isch allerhand
Gratis zem ene Kanton Schwoobeländ
Und kemme die Zwai au no zer Schwyz
So schrumpfti Dytschland nomool e bitz
Eso waggst d Schwyz denn nundefaane
Ooni Gwalt zur neie Groossmacht aane
Mit em en e Volgg vo vierzig Mylioone
Doch eerlig gsait – wurd sich das loone?

D Frau Fasnacht laadet y an d Ladärne-Usstellig
uff em Minschterblatz und uff e Kasärneblatz an
d Usstellig vo de Wääge und Reggwisyte vom
Mäntigzoobe bis am Mittwuch demoorge.

www.muggedaetscher.ch